



SETEMANE
DE CULTURE
FURLANE

Societât
Filologjiche
Furlane

COMUNICÂT STAMPE

Passe cent e cincuant apontaments dai 9 ai 19 di Mai dal 2019

E partîs la seste edizion de “Setemane de culture furlane”

Une grande vitrine pe furlanetât jenfri Udin, Pordenon, Gurize, Cjargne e il Venit

Passe cent e cincuant apontaments in plui di otante püescj dal Friûl, e no dome. Tra chescj, 22 cunvignis e conferencis, 38 incuintris e presentazions editoriâls, 22 visitis vuidadis e mostris, 20 concerti e spetacui, plui di cincuant apontaments di leturis e laboratoris in marilenghe pai fruts.

A son chescj i numars de VI edizion de **Setemane de culture furlane**, la rassegne de Societât Filologjiche Furlane che chest an si tignarà **dai 9 ai 19 di Mai** cuntune biele schirie di iniziativis su la storie, lis tradizions, il teritori, l'art, la lenghe, la leteradure e la musiche dal Friûl. Pal storic Sodalizi al è un grant impegn, che al permet di rinfuarcî un projet di colaborazion cun cetantis e impuartantis realtâts dal teritori: plui di cent tra associazions culturâls, grups corâi e teatrâi, plêfs e parochiis, museus, prolocos, scuclis e istitûts comprensîfs. Un impegn ch'al à inmò plui valôr chest an che a colin i cent agns di storie dal Istitût, fondât a Gurize ai 23 di Novembar dal 1919.

La rassegne e à vût il patrocini dal **Ministeri pai Bens e lis Ativitâts Culturâls**, de **Regjon Autonome Friûl Vignesie Julie**, dal **Consei Regjonâl** e di **pasce 80 comuns**. Ancje la Fondazione Friûl e à garantît la sô poie ae *Setemane*, dentri de convenzion trienâl cu la Societât Filologjiche.

«La culture – al motive il **President de Societât Filologjiche, Federico Vicario** – e je dal sigûr la espression plui alte e fuarte de identitât di un popul e la nestre *Setemane* e dà continuitât a une azion di promozion e di valorizazion de identitât furlane, che e cjale cun braûre al so passât e cun fiducie al so avignî».

La rassegne si vierzarà cun dôs iniziativis che a jentrin tes manifestazions pal Centenari de Societât: joibe ai 9 Mai inte cjase li ch'al nassè Pieri Zorut a Dolegne dal Cuel al vignarà presentât il **Strolic dai Strolics**, une antologjie rincurade di Dani Pagnucco che e cjape dentri lis plui bielîs pagjinis dal *Strolic furlan*, il storic volumut che la Filologjiche e publiche fintremai dal 1919.

Vinars ai 10 di Mai a Gurize il Comun e la Filologjiche a sotscrivaran l'acuardi par doprâ la cjase li ch'al nassè Graziadio Isaia Ascoli - pari fondadôr dai studis di linguistiche, che la Societât i è intitulade - tant che sede dal Istitût pal Friûl di soreli jevât.

Come simpri la *Setemane de culture furlane* e sarà ancje la ocasion par memoreâ chês personalitâts innomenadis che, ognidune intal so setôr di ativitât, a àn onorât la nestre tiere cul lôr lavôr, la lôr passion e il lôr jessi furlans: tra chescj si ricuardaran i scritôrs **Carlo Sgorlon (a Cjassà)** e **Novella Cantarutti (a Spilimberc)**, il lenghist **Jacopo Cavalli (a Mugle)**, il gjeograf **Guido Barbina (a Mortean)**, il storic **Amelio Tagliaferri (a Cividât)** e a Udin **Lelo Cjanton**, promotôr dai cors di furlan e l'editôr musicâl **Bruno Rossi**.

La rassegne e rindarà ancje onôr a Aquilee tai 2.200 agns de fondazion, cul concerti de Corâl Zovanîl dal USCI FVG, inte basiliche patriarcjâl domenie ai 12 di Mai: pe ocasion la corâl e cjantarà ancje, in prime assolute, il toc ***Patriarcharum vestigia*** comissionât di pueste al compositôr Andrea Venturini.

Nol manjarà un moment di atenzion particolâr pal feminin cul incuintri **Donne del Friuli, oggi** in program a Palaç Mantica a Udin vinars ai 17 di Mai, che al intint presentâ il contribût di impuartantis feminis dal Friûl che, cun professions diversis, a àn savût esprimi la fuarce e la culture de nestre tiere.

Ancje la edizion 2019/2020 dal **diari scuolastic Olmis**, che al vignarà presentât a Tarcint ai 13 di Mai e in divers lûcs ator pal Friûl cun Claudio Moretti, e je dedicate aes personalitâts che a àn insiorât il Friûl cun impegn, inzen, ma ancje cul lôr esempi. La *Setemane*, che e je simpri stade atente ai plui piçui, ancje chest an e propon trê **“maratonis” di leturis in lenghe furlane** inmaneadis tes bibliotechis e tes scuelis in colaborazion cui Sistemis bibliotecaris dal Friûl, dal Friûl di Mieç e de Basse furlane e in colaborazion cu la ARLeF.

Si confermin ancje chest an lis colaborazions cun lis plui grandis rassegnis che si tegin in Friûl in chest moment dal an: *Vicino/Lontano* a Udin, *Sapori di Pro Loco* a Passarian, *Campanili aperti* tal Friûl di soreli jevât e ancjemò *Rosazzo da Rosa* inte Badie di Rosacis e il festival di musiche antiche *Perle 2019*.

La *Setemane* si sierarà domenie ai 19 di Mai cu la **Fraie de Vierte**, la tradizional fieste di primevere de Societât Filologjiche Furlane, che chest an e sarà fate a For di Sore, cu la presentazion di un numar speciâl de riviste «Sot la Nape». Come ogni an, inte suaze des celebrazions de *Fraie*, si premiaran i students des scuelis superiôrs che a àn vinçût i concors di traduzion in lenghe furlane e a vignaran dâts fûr i atestâts dai cors pratics di lenghe e culture furlane che si son tignûts in tancj comuns dal Friûl.

Par cognossi il calendari de *Setemane* par intîr e i programs des iniziatives, si pues cjalâ il sît internet www.setemane.it.

Udin, ai 7 di Mai dal 2019

Par informazions:

Societât
Filologjiche
Furlane



Società
Filologica
Friulana

Societât Filologjiche Furlane “G.I. Ascoli” – Uffici Progjets e Events
Vie Manin, 18 - 33100 Udin
Tel. + (39) 0432 501598 - Fax + (39) 0432 511766
eventi@filologicafriulana.it - www.filologicafriulana.it